

新鄭縣志

D5
793
H52
H9674
1996
v.1

v.1



重修新鄭縣志序

歲在癸卯涖灘之陽月予輯新鄭邑志成
有譏其太繁者余曰夫志之作何昉乎古
者邦國之志小史掌之四方之志外史掌
之志猶史也紀天下之事者存乎史紀一
邑之事者存乎志志固博通乎史而詳史
之所略者也蓋先王疆理天下物土之宜

而布其利達其志而通其欲其事至纖至
悉無不各有所掌風俗之美惡則大師大
行人志之戶口之登耗則閭師閭胥志之
民之有德行道藝者族師黨正之屬志之
皆各爲一書月要歲會以統於小史外史
而貯之柱下則謂之寶書西漢計書先上
太史令其副白丞相東漢郡國志上蘭臺

至學士大夫所纂若關中之記華陽之志
襄陽之傳三輔九域十道之圖以及一方
一邑之事列于藝文經籍之目者咸班班
可考焉然則志之作可略乎哉且鄭之爲
邑舊矣都于有熊國于鄆于鄭于韓而縣
于漢新鄭云者以別于京兆之鄭言也按
元和郡國志漢之南鄭在漢中府京兆則

桓友封邑之鄭曰西鄭亦曰南鄭屬華州
因鄭有圃田曰圃鄭因遷曰新鄭卽今邑
是也而墨莊漫錄復疑漢中南鄭京兆有
西鄭亦曰南鄭又疑新鄭之名因穆天子
傳書天子入于南鄭傳瓚謂穆王所都祭
父自圃鄭來謁瓚亦指謂鄭父之邱而不
能定桐城方氏考括地志云在華州鄭縣

西北三里其曰西鄭者以圃鄭爲東也曰
南鄭者華州在鎬京之南也瓚謂鄭桓公
無封京兆之文師古又曰穆王以下無西
鄭事瓚說非也此皆混于其名耳穆王出
遊入必返西鄭鄭近都蓋圻內之邑或別
宮在焉應劭曰友封于西鄭其子與平王
東遷更稱新鄭水經注竹書紀年晉文侯

二年同王子多父伐鄆克之乃居鄭父之
邱名之曰鄭服虔云鄭取鄆而不居其都
杜注鄆在滎陽密縣東北新鄭在滎陽宛
陵西南由此觀之或者桓先封華州後伐
鄆而封鄭乎是未可知也要之時代久遠
傳聞不一苟不詳爲紀載則後之志古者
將何所証據乎然則志之作可畧乎哉邑

志自前明草創山川古蹟職官人物藝文
多脫畧

國朝雖兩踵修而莫能是正余于去冬開
局凡歷代掌故之書下逮稗官小說無不
搜羅金石之文無不抉剔山川之脉絡道
里之綿亘無不綜覽而條析之雖不敢謂
毫髮無遺憾而於前志庶幾多所考訂者

矣又周官曰凡此五物者每國辨異之以
周知天下之故戴記曰皆如其國之故一
縣之地不過方數百里而上下數千年其
爲故也繁矣明關中諸志率以簡勝然王
漁洋於朝邑志有毋乃太簡之嘆鄭簡菴
新城舊志自序曰異時重編之應有一百
數十卷之多漁洋亟取其言以爲作志者

法夫志猶史也卽賢如涑水紫陽而通鑑
綱目兩書猶卷帙浩繁若彼然則志之作
可畧乎哉抑余聞之鄭罔有書見左氏傳
鄭司農卽謂之邦國之志而惜乎此書久
軼不得傳述又不禁望古而三嘆也至是
書之成多藉邑紳士襄贊之力余竊奉教
于鄭諸君子爲命之意云

乾隆四十一年歲在丙申十月新鄭縣知

縣嘉興黃本誠序



修新鄭縣志舊序

順治十六年

馮嗣京

邑令

自古王者大一統莫不首徵文獻矣夫文獻視乎紀載之書家有乘國有史而邑有志一圻一同皆然繁鄭獨無鄭始有熊氏而著於春秋卽以春秋之鄭言當時奔走禍至之無日國僑惠養載其清淨民以寧一今按封洹廬井及輕幣諸籍瞭若指掌志之不可已也如是夫然前乎此者有志矣後乎此者有志矣而明季迄我

聖朝又四十餘年奚東里無志乎問邑之戶口圖蹟若何邑之風俗沿革若何邑之選舉賢良若何邑之官署崇典兵防驛傳若何邑之鄉社祠廟封建人物星野災祥若何邑之忠孝隱逸方技

仙釋藝文襍識若何流炬之餘灰燼無傳記曰有法無法因時
爲業有度無度因物與合司茲土者何以時變是守爲損爲益
耶余自丁酉承乏卽志補敝救廢奈學宮伐磬伊始拮据捋茶
捐捐二載未艾也兼之駢駢使者絡繹不絕送往迎來靡有寧
晷遑語研墨也者前奉開府大人督志之檄適值文廟落成之
期舉向之補敝救廢有志未遑者此其研墨時也吾惡乎志諸
吾亦集其事而裁其成非我有成其在人乎草創者討論者修
飾者潤色者人已殫長以云志也寢邱五明李君恢奇多聞暨
二三紳士文行素著余乃萃藝館執手而誠曰疑傳疑不如勿
志今日者蓋其慎哉弗敢過也不敢不志焉其庶幾乎亡於志

者之志也閱兩月而事竣抑竊有厚望矣昔春秋之鄭介晉楚
今之鄭接三州我馬蹇崩不敵也春秋之鄭辛苦墊隘今之鄭
流氛子遺生聚未復黎民重困不敵也所恃邑乘具列上臺有
憐恤之典以當國僑惠養清淨寧一係此舉也寧止盡飾行遠
也哉夫子鹿鹿鞅掌簿書酷有文字之樂羣序士月有試季有
考初以爲娛志八股焉者孰知煌煌史冊李君諸賢士之相與
有成耶假手以報開府之命文獻是徵或可博一領也是爲序
修新鄭縣志舊序

順治十六年

張光祖

邑人

考之周禮司民刑方之掌周知生齒疆索之類天下之大勢握
焉邦國圖籍蓋綦重也部院賈公祖彙修兩河通志檄督州縣

可謂急先務矣然修舛錯之志易爲功而修己灰之志難爲力
鄭自流土交訐書板俱燼於焉創新謀始自非博物鴻裁惡能
勝其任而愉快乎邑父母馮公大筆如椽兼以署諭李先生文
章宿老互相商確或訪之名儒或詢之故老或叅之斷碣殘碑
往事僅存千百於什一而歲時景物忠孝節義靡不志以著之
簡而核典而則余披其草懼然曰古有才足了十人殆公之謂
耶猶憶往涖恩時聞公下車歲餘諸陋盡草庶美釐舉逡巡以
爲不如復聞迎送僕僕之暇日與李先生建文廟朔奎樓文武
兩社一旦振興且出餘力成茲紺帙何才之裕如也以故農忙
於野士忙於庠有昔時太邱之風焉徽猷茂績可述而志使太

史遷復起收入實錄所不誣也余八年倡倡吏治幸擢兵曹懼
乏長子之選爲大司馬辱忽被流風所惑桓桓武事頓加飭焉
其造於余實多矣寧直一志彰善聲哉謹抽毫以爲序

續修新鄭縣志舊序

康熙三十三年

朱廷獻

邑令

予於己巳夏之新鄭官明年秋奉闕大中丞檄修邑志辛未書
成以稿本上壬申冬字無損益飭就梓人予以衝驛旁午卒卒
未能將事閱甲戌春顧大中丞來撫豫吏畏民懷百廢具舉復
檄各屬僉謀剗剗梓成例得弁語簡端乃不揣爲之序曰考古
周官以職方掌輿圖而外史小史領邦國四方之志志之由來
尚矣天子統御天下則聚海內山川疆域戶口人物之數著之

版籍藏之天府所謂一統志也嗣是而省有通志郡有府志邑有縣志雖其間義例各殊繁簡不一而所以昭一統垂千古定是非明鑒戒以備史氏之採擇則無弗同典甚鉅也新鄭本豫之下邑然爲有熊故墟自虞夏以迄元明名賢肇跡代有聞人炳耀史冊固衣冠文物之區也志何可弗備備何可弗詳乃自已亥迄今閱三十餘年莫之或講不無抱殘守闕有待於作者甚亟乃先後兩撫憲雅志振興宏修鉅典嚴檄各郡邑及時修舉予不敏敢不黽勉從事矧邑志令責也假令宰是邑而問其戶口若何賦稅若何曰弗知問其山川土俗與夫鄉之賢士大夫前言往行若何曰弗知以暨沿革損益先後異同若何曰弗

知予實惡焉爰據圖籍載考方聞復集邑之紳士並博學君子
校讐叅訂繁者刪之佚者補之舛誤者引經據典而訂正之稿
凡數易誠慎之也夫士人兀處一室目不覩山川人物之奇胸
未羅邱索墳興之盛幸服一官日惟簿書錢穀縈擾志慮而欲
採風問俗攷古証今取邑之山川疆域戶口人物燦然胸臆勒
爲成書難矣况予備位衝驛日執手板謀送迎備供億凜凜畏
咎苦不暇給敢撻不律自附于作者之林何可得耶是役也仰
見

聖天子百度咸飭文教聿興海隅日出罔不漸被先後兩中丞復矢
志振興宏修鉅典故不辭固陋纂輯成書以告後之君子若曰

是足以佐石渠纂修之業則予豈敢

新鄭縣志重修姓氏

鑒定

兵部侍郎都察院副都御史巡撫河南提督銜節制金省軍務兼理河道 徐 績

河南按察使司按察使署理布政使司布政使事 榮 柱

河南開歸陳許兵備道署理按察使司按察使事 周於智

河南開歸等處督理通省驛鹽水利糧務道 赫爾敬阿

署理河南分巡開歸陳許兼管水利兵備道開封府知府 王啟緒

纂修

新 鄭 縣 知 縣 黃本誠

較訂

前任新鄭縣教諭謝王選

新鄭縣教諭張相武

新鄭縣訓導趙榮清

經理

新鄭縣典史俞鵬程

分修

舉人高裴乾

生員蘇如濤

總理

壬戌科進士原任山東陽穀縣知縣劉化武

增

廣

生 張吏潔

貢

生 劉如鈿

監

生 候 選 吏

目 劉如鑾

監

生 劉君珠

監

生 秦鳳光

貢

生 高耀彬

增

廣

生 劉如鎰

生

員 馮兆麟

候 選 訓 導 現 授 淮 寧 縣 訓 導 高 特 用

監

生 馮寅生

候

選

教

諭 高特拔

採訪

舉

人 馮大興

歲

貢

生 劉國琦

布

衣 馮永祚

生

員 趙國寧

廩

生 高岱

生

員 黃思睿

歲

貢

生 夏新浴

拔

貢

生 劉齊法

生

員 蒲振邦

廩

生 張紹芳

廩

生 王琳

廩

生 蔡相

監

生 馮嵩生

校閱

生

員 吳鴻儒

生

員 王鳳池

增

廣

生 胡孝先

增

廣

生 高超

生

員 高崢嶸

三

新鄭縣志凡例

一卷首恭編

聖製者遵

王章也我

朝

聖聖相承咸有一德訏謨訓誥徧於寰宇新鄭雖小邑得被

聖化漸摩久矣敬錄

御製諸文冠弁全集不特增輝簡冊庶幾是訓是行仰瞻

天子之光於萬一云爾其敘述文字有當諱者俱遵照

頒行經史缺其點畫不復改避

一邑舊志創自前明萬歷戊午邑令陳公大忠閱四十六年

國朝順治己亥邑令馮公嗣京修之閱三十五年康熙甲戌邑令朱公廷獻續修之陳志值明季之變久已散佚馮志僅有殘帙惟朱志現存皆因陋就簡多有譌漏迄今八十二年無有起而是正之者予蒞任後急思修輯而匆匆未果去秋始與諸紳士相商爲之遂欣然共事然幾費經營矣

一志須識詳略蓋志乘之作自下而上縣志先志其詳無論無漏由是而郡志而省志舉義刪繁釐訂而薈萃之庶成善本此縣志之所由昉也今與諸紳士廣搜博採益以見聞訂成一書務溯流窮源不至遺珠之嘆凡閱過典籍二千有餘採入者幾得

其半視前志已五倍之要期傳信後世非敢誇多鬪靡較勝前人

一志須有條理舊志列卷分門不分綱目未免混淆是書作者
二曰沿革曰星野作表者二曰職官曰選舉作傳者一曰循吏
作志者十有二曰疆域曰風土曰山川曰建置曰賦役曰學校
曰祠祀曰人物曰藝文曰金石曰經籍曰雜志悉倣諸史及三
通爲之核實定名惟求確當其餘封建祥異形勝物產古蹟橋
梁兵制郵政書院陵墓之屬有當載入者則各以類附焉

一志須有定式舊志紛然不一每卷篇名或虛或實叅錯並書不
相聯屬又懼其易混乃至以一二頁爲一卷益非式矣今分門

一十又七分卷三十又二各爲標識自開卷迄終篇較若畫一
爲綱爲目一覽了然

一志旣編卷帙須分先後庶次第位置不致凌躐是志首沿革沿革明而疆域定矣星野由疆域而見也然仰觀俯察自當先之以星野故疆域次之風土亦疆域之類山川則附乎疆域者也故又次之相其陰陽廼興版築則建置次之都邑旣立非官師不足以表率一方也故次職官有職官則有循吏故循吏次之于焉定取民之制求齊民之術籌奠民之方而賦役學校祠祀興矣故次賦役次學校次祠祀由是而有選舉有選舉而人物生人物生而藝文彰矣金石經籍者藝文之餘而雜志則補諸

志所未及也故次第列之由一類而論則自爲脉絡由全書而論則首尾相貫矣

一古人讀書必左圖右史則圖固不可缺也茲志仍列數圖曰星野曰疆域曰山川曰城池曰學宮曰衙署而諸圖中尤詳于山川者重地理也一展卷而道路形勝瞭若指掌矣然諸志多列之首簡徒取觀美而於本事若不相涉茲志悉以類見非敢好異亦倣古人讀書之意也

一各表或倣史記或倣漢書或倣唐書式有不同而職官選舉表下必先著明某人有傳無傳以便檢閱

一志貴補闕如舊志沿革則闕分屬星野則闕叅攷山川則闕原

委祀典則闕其儀鄉閭則闕其數職官也而人闕選舉也而科
闕名宦鄉賢也而事闕此而尚闕則無之非闕矣何以示典則
備考鏡乎茲志悉採諸書以補之

一志貴訂譌夫志以傳信也非可信而傳會之不失之誣卽失之
鑿矣舊志雖簡而譌者實多今皆一一釐正覽者以舊志覆核
則知單詞隻字俱非妄改云

一志貴闡幽凡事與人之在耳目間者尚可摹繪得之或懷貞抱
獨湮沒已久而僅于他書略見一二則紀載類多不及是志與
邑諸君子搜輯舊聞幾費心力雖細必錄雖微必彰採千秋之
軼事發潛德之幽光于此尤用意焉

一志貴證據昔衛正叔作禮記集說曰他人著書惟恐不出于己予此編惟恐不出于人吾鄉朱竹垞輯曰下舊聞所鈔羣書皆分註于下余亦竊倣此義或加刪削則曰節或加櫟括則曰見至後來人物無書可據者則書採訪諸君之名不特見言之有本且以明取舍之咸出公論也

一引書之例第一條註某書連引二三條則曰同上多至四五條則曰以上俱見某書

一志忌重複但事有關涉數處者則彼此俱見互相勾貫而詳略不同此古人互文例也然必註明詳某處云云以便徵考

一沿革歷年已久錯綜交互紊若棼絲舊志過于簡略誠非所宜

卽通志及府志亦間有異同今悉心究索一準諸史地理郡國諸志叅互攷訂不敢一字牽附其間大者則辨明之小者則隨事改正之凡經前人辨析明當者俱爲纂入間有鄙見則以按字別之餘皆倣此

一新鄭自武公遷居後始有是名作志者似當以武公時爲始而是書沿革則肇自有熊氏以及陸終氏爲都爲國悉詳考而彙書之亦祭川先河之義云

一所志山川皆于水經郡志諸書詳爲徵引復加履勘備得曲折然後登錄不特視舊較詳亦欲使後之君子有所考据焉

一舊志職官僅列宋元以下數人而于漢魏晉書旣不登載實爲

簡畧今自漢至唐得令長十四人丞一人主簿一人尉三人或載史傳或見金石皆鑿鑿可據者至于由宋及明隨時補入益不可枚舉矣

一賦役自明以前旣不足徵而舊志所載亦略而不備且自丁銀攤入田畝之後戶口亦爲具文其前後零數總數類多分合不符今無可攷者悉仍其舊惟近年正供之額攷核必詳至頻年疊被

恩綸卹政所及必謹書之他若事關賦稅有益於利弊者亦悉載入民生所係不敢不慎也

一人物自龍門作史創爲本紀書表世家列傳後世莫能復易者

名臣
五
遵其式也史固尚之志亦宜然故是書悉倣之

一 人物先本紀世家年表而後有列傳列傳之外又分忠節孝義
隱逸流寓仙釋以及列女而邑之可傳者具是矣

一 鄭多君子人物自當以鄭大夫爲盛故另立一卷悉取左氏所
傳春秋二百四十年行事與夫國語史記外傳所錯出者爲連
屬而比合之其無所考核卽片言數語足傳其人者亦所不廢
餘悉倣此而人物全矣

一 志取褒善有勸無懲豈史家體例善惡並列者乎茲志止就一
邑人物惟善是與不敢稍存譏刺然亦不敢過徇鄉曲一秉至
公以成信史

諸志名宦人物以皆人自爲傳茲則有專傳有合傳附傳亦敘史法爲之

一 人物例不爲生人立傳惟守貞列女已奉旌表及年例已符而有待旌表者事經核實雖其人尚存悉登入志以示風勸至耆壽一門前志已破例載入不便刪去今照舊續之亦

聖朝尚年之意云

一 人物已見正史及諸文集者悉錄全傳非但徵實亦廣見聞其或不應入人物而名著一時且有事蹟當考如祭仲韓信都之類皆入附傳以備觀覽然止此二人見于左史者及之他則不援此例

一 文以載事事非文不傳也故有關境內者悉錄之然必細加斟酌卽舊志所載浮泛者去之冗長者節之語疵者易之豈予之好勞哉惟祈于是而已矣

一 諸志藝文多分體類茲一以時代編次代以統人人以統文亦古人編書之意也詩亦悉倣此例

一 墓誌銘表非名公鉅製不錄今採訪所送多不錄入其真有佳文而宦績顯著者仍錄之

一 諸家作志往往競尚詞華遂引瀟湘西湖諸劍後粧名勝八景開卷爛然而子虛無是亮乎未有綺語浮文祇堪一噓今悉刪去而僅附其名於古蹟之後者恐好事家轉以此爲惜也

一志載金石器存齋新安志例也今厚揚雖未能徧而抉幽剔隱
頗費苦心有關先代墳墓及事實可紀者卽片碣斷碑亦所不
廢

一各史藝文志及鄭樵通志之藝文略馬端臨文獻通考之經籍
考祇列書目原未選入詩文今各志藝文專選詩文不列書目
是文選體非藝文體也但相沿已久不爲無補故仍從之而另
列經籍志一類以別之

一旣曰雜志則自經史子集之外卽稗官家言有可以資攷核助
談柄者咸當類次然志在激勸或稍涉幽異如太平廣記所載
隴西李陶之邂逅女郎兗州李叅軍之就婚蕭氏雖屬唐時舊

聞亦不敢濫爲採入

一志須詳慎昔顧亭林在永平或屬爲府志亭林謝之曰郭造卿在戚將軍幕府搜羅天下書志略備盖十年而成燕史而今無其時故也近來郡縣皆有志覆視之則多亭林所謂取成于數月之內者耳今雖學謝前人然力有所及必不敢苟爲率略以犯前人之譏

一志中前輩悉書其名竊取臨文不諱之義

一志有創有因志雖因實創有舊無而今有者則係新補有舊同而今異者則係刪構有舊略而今詳者則係增訂是因是創識者必能鑒別也

事蹟見于左國者甚多茲志盡爲采摭且于經史之外廣摭旁搜以揚厲盛美特自明季流寇兵燹之餘故家文獻鮮有存者不無遺憾于缺畧云

一茲編較舊志卷帙繁多蒐訂非易諸紳士各具苦心未敢掠美故于卷首備載其姓名以垂不朽

一志開局于乙未十一月告成于丙申九月增者十之七更者十之三刪者十之二名雖仍舊而體則從新祛浮覈實訂譌補缺余與邑中諸紳士幾及一載之勞公聽並觀其難其慎後之讀此志者其亦有以諒余之苦衷也夫

邑令嘉興黃本誠思堂氏識

右數則聊舉作書大凡其書中條分縷析申明微旨皆於各
卷標目及隨條之下零星附見又非例之所能盡述也不誠
再識

新真縣志總目

卷首

聖製

卷一

沿革考

附封建

卷二

星野考

有圖
附祥異

卷三

疆域志

有圖
附形勝

卷四

卷首

總目

風土志 附物產

卷五

山川志 有圖
附古蹟

卷六

建置志 有圖
附橋梁

卷七

職官表 附兵制

卷八

循吏傳

卷九

職役志

卷十

學校志

有圖
附書院

卷十一

祠祀志

附陵墓

卷十二

選舉表

卷十三

人物志一

本紀
世家

世系圖
年表

卷十四

參首

總目

人物志二
列傳

卷十五

人物志三
列傳

卷十六

人物志四
列傳

卷十七

人物志五
列傳

卷十八

人物志六
忠節
鄉耆

孝義

卷十九

人物志七
仙釋

卷二十

人物志八
列女

卷二十一

藝文志一
上古周

卷二十二

藝文志二
周左傳

卷二十三

藝文志三
周諸子

卷二十四

卷首

總目

藝文志四

漢唐

晉

卷二十五

藝文志五

宋元

卷二十六

藝文志六

明

卷二十七

藝文志七

國朝

卷二十八

藝文志八

詩上
詩下

卷二十九

金石志

卷三十

經籍志

卷三十一

雜志

卷首

總目

目

新鄭縣志卷之首

聖製

世祖章皇帝訓飭士子卧碑文

順治九年

朝廷建立學校選取生員免其丁糧厚以廩膳設學院學道學官以教之各衙門官以禮相待全要養成賢才以供

朝廷之用諸生皆當上報

國恩下立人品所有教條開列于後

一生員之家父母賢智者子當受教父母愚魯或有非爲者子旣讀書明理當再三懇告使父母不陷于危亡

一生員立志當學爲忠臣清官書史所載忠清事蹟務須互相講

究凡利國愛民之事更宜留心

一生員居心忠厚正直讀書方有實用出仕心作良吏若心術邪刻讀書必無成就爲官必取禍患行害人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入卽有切己之事止許家人代告不許干預他人詞訟他人亦不許牽連生員作証一爲學當尊敬先生若講說皆須誠心聽受如有未明從容再問毋妄行辯難爲師長者亦當盡心教訓勿致怠惰

一軍民一切利病不許生員上書陳言如有二言建白以違制論
黜革治罪

一生員不許糾黨多人立盟結社把持官府武斷鄉曲所作文字
不許妄行刊刻違者聽提調官治罪

聖祖仁皇帝聖諭十六條

康熙三十年

敦孝弟以重人倫

篤宗族以昭雍睦

和鄉黨以息爭訟

重農桑以足衣食

尚節儉以惜財用

隆學校以端士習

黜異端以崇正學

講法律以儆愚頑

明禮讓以厚風俗

務本業以定民志

訓子弟以禁非爲

息誣告以全善良

誠匿逃以免株連

完錢糧以省催科

聯保甲以弭盜賊

解讐忿以重身命

聖祖仁皇帝御製碑

至聖先師孔子贊并序

蓋自三才建而天地不居其功一中傳而聖人代宣其蘊有行道之聖得位以綏猷有明道之聖立言以垂憲此正學所以常明人心所以不泯也粵稽往緒仰溯前徽堯舜禹湯文武達而在上兼君師之寄行道之聖人也孔子不得位窮而在下秉刪述之權明道之聖人也行道者勲業炳於一朝明道者教思周於百世堯舜文武之後不

有孔子則學術紛淆仁義湮塞斯道之失傳也久矣後之人而欲探
二帝三王之心法以爲治國平天下之準其奚所取衷焉然則孔子
之爲萬古一人也審矣朕巡省東國謁祀闕里景企滋深敬摛筆而
爲之贊曰

清濁有氣剛柔有質聖人參之人極以立行著習察舍道莫由惟皇
建極惟后綏猷作君作師垂統萬古曰惟堯舜禹湯文武五百餘歲
至聖挺生聲金振玉集厥大成序書刪詩定禮正樂旣窮象繫亦嚴
筆削上紹往緒下示來型道不終晦秩然大經百家紛紜殊途異趣
日月無踰羹墻可晤孔子之道惟中與庸此心此理千聖所同孔子
之德仁義中正秉彝之好根本天性庶幾夙夜勗哉令圖溯源洙泗

景躅唐虞載歷庭除式觀禮器摘毫仰贊心焉遐企百世而上以聖
爲歸百世而下以聖爲師非師夫子惟師於道統天御世惟道爲寶
泰山巖巖東海泱泱牆高萬仞夫子之堂孰窺其藩孰窺其徑道不
遠人克念作聖

顏子贊

聖道早聞天資獨粹約禮博文不遷不貳一善服膺萬德來萃能化
而齊其樂一致禮樂四代治法兼備用行舍藏王佐之器

曾子贊

洙泗之傳魯以得之一貫曰唯聖學在茲明德新民止善爲期格致
誠正均平以推至德要道百行所基纂承統緒修明訓辭

子思子贊

於穆天命道之大原靜養動察庸德庸言以育萬物以贊乾坤九經
三重大法是存篤恭慎獨成德之門卷之藏密擴之無垠

孟子贊

哲人既萎楊墨昌熾予與闢之曰仁曰義性善獨闡知言養氣道稱
堯舜學屏功利煌煌七篇並垂六藝孔學攸傳禹功作配

世宗憲皇帝上諭訓飭士子碑

雍正四年

國家建立學校原以興行教化作育人材典至渥也朕臨御以來隆
重師儒加意庠序近復慎簡學使釐剔弊端務期風教修明賢才蔚
起庶幾樸棧作人之意乃比年士習未端儒效罕著雖因內外臣工

奉行未能盡善亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功源委有敘爾諸生幼聞庭訓長列宮牆朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考業勿雜荒誕之談取友親師悉化驕盈之氣文章歸於醇雅毋事浮華軌度式於規繩最防蕩軼子衿佻達自昔所譏苟行止有虧雖讀書何益若夫宅心不淑行已多愆或蜚語流言脅制官長或隱糧包訟出入公門或援撥姦猾欺孤凌弱或招呼朋類結社邀盟乃如之人名教不容鄉黨不齒縱幸脫褫扑濫竊章縫返之於裘寧無愧乎况鄉會科名乃掄才大典關係尤鉅士子果有實學何患困不逢年顧

乃標榜虛名暗通聲氣夤緣詭遇罔顧身家又或改竄鄉貫希圖進
取囂凌騰沸網利營私種種弊端深可痛恨且夫士子出身之始尤
貴以正若茲厥初拜獻便已作姦犯科則異時敗檢踰閑何所不至
又安望其秉公持正爲國家宣猷樹績膺後先疏附之選哉朕用嘉
惠爾等故不禁反復惓惓茲訓言頒到爾等務共體朕心恪遵名訓
一切痛加改省爭自濯磨積行勤學以圖上進國家三年登造束帛
弓旌不特爾身有榮卽爾祖父亦增光寵矣逢時得志寧俟他求哉
若仍視爲具文玩愒勿儆毀方躍冶暴棄自甘則是爾等冥頑無知
終不能率教也旣負栽培復干咎戾王章具在朕亦不能爲爾等寬
矣自茲以往內而國學外而直省鄉校凡學臣師長皆有司鐸之責

者並宜傳集諸生多方董勸以副朕懷否則職業勿修咎亦難追勿謂朕言之不預也爾多士尚敬聽之哉

皇上御製詩文

張子房贊

子房報韓讐傾產不謀家去項而事劉迹如博浪沙功成託導引豈曰棲煙霞全身更全名飄然高風遐高風本血誠莫使毫釐差

留侯

博浪金椎中屬車圯橋遁跡得奇書坐謀帷幄追秦鹿立定中原覆楚狙烏喙事成多變詐鴟夷功遂棄簪裾復仇當日因韓出滅項興劉亦緒餘

子房

倬彼留侯家世相韓嬴殄韓宗心瘁力殫東得力士擊之博浪匿遊
下邳受書圯上乃得其傳乃遇其主謂沛公英仁是殆天所與帷幄
運籌千里決勝魚水之歡諫從言聽既遂其志亦遯而肥優游赤松
烟水鴟夷眎彼渭濱同歸一轍渺矣風清冷乎冰潔

許衡論

人君開國承家創業垂統必有通經明道規模宏大之臣爲之立法
垂猷使子孫有所鑒成憲而持永久斯立國之要也元自太祖太宗
以及世祖并有天下莫不率服亦賴有一二名臣爲之左右於其間
使敷政設教有以成一代之紀綱則耶律楚材許衡其人也二人立

綱陳紀爲國成憲才智兼全經理庶務衡讓於楚材而明道通經匡
君定國講明禮樂立一國之規模則楚材又讓於衡焉觀其首陳四
策其立國規模一疏世祖累用其言已有成效至於言治道勸用賢
言養民皆天下急務而不見大用於世乃天下之不幸亦有元之不
幸也自朱子以來繼傳之儒代不乏人然推西山魯齋爲尤卓西山
生於宋末雖爲叅政不究其用魯齋當元初尊信朱子倡明正學世
祖累見信用其功效頗著於西山云

諭祭宋臣王曾文 乾隆十五年

惟爾嚴重持躬端純表範平生言志曾無溫飽之心筮仕登朝雅擅
羽儀之望嘉謨侃侃願惟符應而弗居正色巖巖每人承明而見禮

一身而安中外何愧輔臣片語以決危疑克襄大計朕省方中土紀
溯懿徽弱歲稱詩早裕羹梅之事業大星隕寢猶昭箕尾之光輝式
薦馨香用隆秩祀神其來格尚克歆承



沿革考 附封建

沿革明而疆域定疆域定而人物顯矣邑自有熊徙都後至鄭武公滅檜居之曰新鄭鄭滅於韓韓復滅於秦漢始置邑爲新鄭爲苑陵迄于今所隸既殊稱名亦異其間或分或併或仍或廢見於史書者備著於篇而以封建附注之綜名義而彙辨徵較舊志爲特詳焉作沿革考

古有熊氏之墟

〔竹書紀年〕黃帝軒轅氏居有熊 〔史〕註譙周曰黃帝有熊國君少典之子也皇甫謐曰有熊今河南新鄭是也 〔帝王世紀〕新鄭縣

故有熊氏之墟黃帝之所都也鄭氏徙居之故曰新鄭 史記正

義輿地志云涿鹿本之彭城黃帝初都遷有熊也 拾遺記 軒轅

出自有熊之國母曰吳樞以戊己之日生故以土德稱王也時有

黃星之祥

索隱按皇甫謐云黃帝生於壽邱長於姬水因以爲

姓居軒轅之邱山海經曰在窮山之際西射之南

羅泌路史黃

帝開國於有熊羅苹註世紀云有聖德授國于有熊鄭也又泌國

名記曰有熊帝之開國今鄭之新鄭輿地廣記云古有熊國黃帝

所都云都非

括地志涿鹿城在媯州東南五十里本黃帝所都

也大抵征戰所至都涿鹿卽位乃都有熊

鄭樵通志都邑畧黃

帝都有熊又遷涿鹿註有熊今鄭州新鄭涿鹿卽涿州

廣輿記

軒轅邱新鄭古有熊氏之國黃帝生此因名

按黃帝本紀云少典之子索隱注少典者諸侯國號非人名也亦不言黃帝之先有有熊名號所居之地諸家紛紛不一曰遷都曰開國而明陸應陽云生此不知何據本紀又曰邑於涿鹿之阿遷徙往來無常處以師兵爲營衛上古荒邈考稽爲難要此亦黃帝之一都也

高辛氏以封火正祝融其後陸終氏居之

世本陸終娶于鬼方氏之妹謂之女嬪是生六子孕三年啓其左脇三人出焉啓其右脇三人出焉其四曰求言是謂之郇國高陽世系圖顓頊生稱稱生老童老童生吳回吳回生陸終

史本

紀帝嚳高辛者黃帝曾孫也高辛父曰蟠極蟠極父曰元囂元囂父曰黃帝高辛於顓頊爲族子

路史陸終取鬼方氏曰嬪萃註

世本帝系云鬼方國君之妹女嬪音蒯人表作女嬪故集韻音潰大戴作女隤陸終彭祖之父也

鄭樵通志氏族畧按陸終氏娶

鬼方之女孕而不育十一年開其左脇而出三人焉又開其右脇而出三人焉長曰昆吾名樊已姓封衛墟次曰參胡董姓封韓墟周時爲胡國楚滅之三曰彭祖名翦彭姓封於韓大彭之墟卽彭城也四曰會人邛姓封於鄭墟五曰安曹姓封邾墟六曰季連芊姓其後爲楚昆吾氏爲夏伯湯伐桀滅之彭祖氏爲商伯商之末世始亡干寶以爲先儒多疑此事譙周作古史考廢而不論然六

子之世子孫有國數千年間迭爲伯王天將興之必有尤物若夫
前志所傳修己背坼而生禹簡狄坼而生契歷代久遠莫足相
證近魏黃初五年汝南屈雍妻王氏生男從右脇下水腹上出而
平和自若數月創合母子無恙

陸終氏傳子會人後因爲鄩國

〔左傳〕國語作鄩詩作檜地理志作會

〔鄭語〕史伯曰黎爲高辛氏

火正故命之曰祝融能昭顯天地之光明以生柔嘉材其後八姓
於周未有侯伯王應麟註謂祝融之後已董彭禿妘曹斟芊八姓
也又鄭語妘姓鄩

〔鄭元詩譜〕檜者古高辛氏火正祝融之墟國

在禹貢豫州外方之北滎波之南居溱洧之間祝融氏名黎其後

八姓惟妘姓檜者處其地焉周夷王厲王之時檜公不務政事而
好潔衣服大夫去之於是檜之變風始作其國北鄰於虢徐廣曰
鄆在密縣東北不得在外方之北也

孔穎達毛詩正義鄆祝融

之後復居祝融之墟鄭譜以鄭因號檜之地而國之先譜檜事然
後譜鄭檜曹國小而君奢民勞而政僻季札之所不譏風次於末
宜哉蘇氏曰檜詩皆爲鄭作如邶鄘之於衛也

杜佑通典鄭州

新鄭縣有溱洧二水本鄆國之地

路史高陽氏紀帝之曾孫曰

黎及回黎爲祝融淳耀敦芒天明地德臨照四海是食火土黎卒

帝嚳以回代之回食于吳是曰吳回生陸終陸終生會人又國名

記邾姓一曰會人鄆也

鄭樵通志都邑畧鄭都本西周畿內之

地周宣王以封弟鄭公友及幽王有犬戎之變鄭武公遂遷於
濟洛河潁之間謂之新鄭又氏族畧鄭氏房姓卽鄭仲之國本祀
融之墟在溱洧之間爲鄭武公所并遂爲新鄭今新鄭縣東北三
十五里有古鄭城是也子孫以國爲氏 風俗通陸終之子會乙
之後鄭姓 括地志故鄭城在鄭州新鄭縣東疑作西北三十二里
水經注洧水又東南逕鄭城南 陳士元姓匯黃帝之系求言
鄭姓封于鄭是爲會人其後滅於重國有偃氏鄭氏會氏僞云路
鄔偃夷皆鄭姓也僞侯滅於鄭

唐虞屬豫州夏商因之會人子孫世居焉

禹貢荆河惟豫州顏師古曰西南至荆山北距河水

周禮職方

氏河南曰豫州其山鎮曰華山其澤藪曰圃田其川滎洛其浸波
澹爾雅釋地九州河南曰豫州注自南河至漢又總注云此蓋
殷制漢書地理志堯遭洪水襄山襄陵天下分絕爲十二州使
禹治之水土旣平更制九州文獻通考顓帝之所建帝嚳受之
創制九州統領萬國舜典肇十有二州馬融曰禹平水土置九
州舜分置幽并營爲十二州也

按自堯迄湯沿革不一此地總隸豫州焉

周初仍爲檜國平王東遷鄭桓公自鄭徙於此名鄭國傳二十三世
至康公

鄭語桓公爲司徒甚得周衆與東土之人問於史伯曰王室多故

余思及焉其何所以逃死史伯對曰其濟洛河潁之間乎是其子男之國虢鄆爲大虢叔恃勢鄆仲恃險皆有驕侈怠慢之心加以貪冒君若以固難之故寄孥與賄不敢不許是驕而貪必將背君君若以成周之衆奉辭伐罪無不克矣若克二邑鄆蔽補丹依噪歷莘君之土也若前莘後河右洛左濟主茅騁而食溱洧修典刑以守之唯是可以少固公說乃東寄孥與賄鄆虢受之十邑皆有寄地韋昭注曰後桓公之子武公竟取十邑而居之今河南新鄭是也

〔竹書紀年〕晉文侯二年同惠王子多父伐鄆克之乃居鄭父之邱名之曰鄭是曰桓公

〔史記〕桓公爲司徒一歲幽王以褒后故王室治多邪諸侯或畔之於是桓公問太史伯曰王室多

故予安逃死乎太史伯對曰獨雒之東土河濟之南可居公曰何以對曰地近虢鄆虢鄆之君貪而好利百姓不附今公爲司徒民皆愛公公誠請居之虢鄆之君見公方用事輕分公地公誠居之虢鄆之民皆公之民也桓公曰善于是卒言王東徙其民雒東而虢鄆果獻十邑竟國之

韓非子鄭桓公將欲襲鄆先問鄆之豪

傑良臣辯智果敢之士盡與其名姓擇鄆之良田賂之爲官爵之名而書之因爲設壇塲郭門之外而埋之釁之以雞豕若盟狀鄆君以爲內難也而盡殺其良臣桓公襲鄆遂取之

竹書紀年晉

文侯十四年鄭人滅虢十六年鄭遷于溱洧

詩譜幽王爲犬戎

所殺桓公死之其子武公與晉文侯定平王於東都王城卒取史

伯所云十邑之地右洛左濟前華後河食溱洧焉

馬驥繹史論

曰厲王之少子友宣王封之食采於咸林是爲鄭桓公紀年謂王子多父者也幽王八年爲周司徒以王室將亂謀於史伯寄孥賄鄩虢之間驪山之敗桓公死之其子武公掘突從平王東遷遂滅虢鄩以爲己國史伯之謀驗矣夫史伯知周室之必弊虢石父褒姒之必亂周也又知滅周者必西戎與申繒而秦楚齊晉必且代興其於天道人事察之審矣有臣如此而幽王不用安得不亡顧其所以爲鄭謀虢鄩者始寄賄以誘之終構隙以取之以詐術得人國何愛於鄭而憎於二國哉然自是以後南北之形勢常視鄭而鄭在春秋遂無世無晉楚之爭矣史伯亦見及否邪

按竹書桓公時已克鄆而居于鄭父之邱故曰鄭桓公史記鄭世家桓公卒言王東徙其民雒東而號鄆果獻十邑竟國之與紀年合韋昭注國語其時未見竹書故以取十邑爲武公也鄭之滅鄆是當以國語史記爲據而公羊傳謂古者鄭國處于留先鄭伯有善于鄆公者通乎夫人以取其國而遷鄭何耶又按周彝器有史伯碩父卣銘曰維六年八月初吉己子史伯碩父追孝于朕皇考釐仲王母乳母尊卣黃伯思東觀餘論曰史伯周宣王臣碩父其字也

周烈王元年韓滅鄭康公哀侯自陽翟徙都之自此韓亦號鄭

史記韓世家哀侯二年滅鄭因徙都鄭索隱曰韓旣徙都因改號

曰鄭故戰國策謂韓惠王曰鄭惠王猶魏徙大梁稱梁王然也

竹書紀年晉桓公邑哀侯于鄭

通志氏族畧鄭氏自聲公三世

至幽公韓武子伐鄭殺幽公子孫播遷陳宋之間以國爲氏自幽公二世鄭君乙之二十一年復爲韓所并韓氏姬姓之別族出晉穆侯之小子曲沃成師是爲桓叔生萬是爲武子食采韓原一云成王封叔虞於唐賜畢萬韓原之地其地今同州韓城縣南十八里故城是武子生厥是爲獻子晉景公之時晉作六卿獻子在一卿之位從其始封遂爲韓氏世爲晉卿厥生起是爲宣子起聘於周天子嘉其有禮曰韓氏其昌阜於晉宣子徙居州今懷州武德是也生貞子徙居平陽今晉州也貞子五世景侯與趙魏俱得爲

列侯景侯四世哀侯與趙魏分晉國滅鄭而徙都焉

〔玉海〕詩地

理考鄭州新鄭縣鄭武公之國都韓滅鄭自平陽徙都之戰國策韓之取鄭從成皐始林氏曰春秋戰爭之多者莫如鄭戰國戰爭之多者莫如韓秦漢之間天下有變必於滎陽成皐間決勝負也

按漢書地理志陽翟注云周末韓景侯自新鄭徙都之則陽翟之爲韓都甚明而謂自新鄭徙都則謬也史記韓世家載韓滅鄭在哀侯二年爲周烈王之元年景侯三傳始及哀侯幾三十年當景侯之世鄭繻公尚居其國何由自新鄭徙都之乎又史世家云景侯九年鄭國陽翟蓋是時韓已列爲諸侯或都此故鄭國之不特報武子殺幽公之讎亦切強鄰偏處之虞爾且韓

自居鄭後並未聞有再遷之舉則都陽翟當在未滅鄭之前無疑矣初學記注韓貞子初都河北之平陽後遷陽翟哀侯復由陽翟徙居新鄭馬驢繹史因之似爲有據然顏師古史注號稱博雅旣曰新鄭不應舛誤如此或刻時錯簡後人遂習而不察也

秦滅韓置潁川郡此隸焉

〔史記〕韓世家王安五年秦攻韓韓急使韓非使秦秦留非因殺之九年秦虜王安盡入其地爲潁川郡

〔戰國策〕註哀侯都鄭四世

宣惠王始稱王又五世王安九年秦公子虜王盡入其地置郡縣自景侯至王安六侯五王百七十九年

〔始皇本紀〕二十一年王

剪謝病老歸新鄭

按據史記則縣名秦時已有

漢承秦制改屬河南郡此地有苑陵新鄭二縣

〔漢書地理志〕凡十三部置刺史 本秦京師爲內史分天下作三十六郡漢興以其郡太大稍復開置訖於孝平凡郡國一百三河南郡注故秦三川郡高帝更名雒陽莽曰保忠信鄉屬司隸也縣二十二苑陵注莽曰左亭 舊志作滎陽郡誤

東漢隸河南尹有苑陵新鄭二城

〔後漢書郡國志〕河南尹二十一城注秦三川郡高帝更名世祖都

雒陽建武十五年改曰河南尹 苑陵有裴林注左傳宣元年諸

侯會于棗林杜預曰縣東有林鄉徐齊民北征記曰縣東南有大
隧澗鄭莊公所闢又大城東臨濮水水東溱水注于洧城西臨洧
水有制澤注左傳宣十年諸侯遷于制田杜預曰縣東有制城
有瑣侯亭注左傳襄十一年諸侯之師次于瑣杜預曰縣西有
瑣侯亭新鄭詩鄭國祝融墟注皇甫謐曰古有鄭國黃帝之都
按徐齊民謂溱水在濮水之東疑非舊志作滎陽郡誤

三國屬魏

按三國志無地理可據而晉及北魏志地理者皆有苑陵無新
鄭隋書言新鄭後魏廢疑或指曹魏而言而裴松之三國志註
新鄭有長一人但所引乃太祖時事耳或文帝以後縣廢爲鄉

亭之類亦未可知故新鄭之名雖時見於他書而隸屬不登於職方盖有由也

晉泰始二年置司州分河南立滎陽郡統縣八滎陽京密卷陽武陵陵中牟開封皆屬焉此爲苑陵

〔晉書〕地理志司州司隸校尉統之又永嘉之後司州淪沒劉聰聰以洛陽爲荊州及石勒復以爲司州石季龍又分司州之河南河東宏農滎陽兗州之陳留東燕爲洛州元帝渡江亦僞置司州於徐非本所也舊志作河南郡誤

後魏天平初分滎陽置廣武郡隸北豫州曲梁原武陽武中牟苑陵屬焉此爲苑陵

魏書地形志廣武郡治中左城苑陵注二漢屬河南晉屬汝陽

按晉書屬滎陽郡不屬汝陽天平初屬有新鄭城鄭莊公廟子產祠苑陵城

又梁州開封郡尉氏注云二漢晉屬陳留興安初併苑陵大安三年復又荊州襄城郡領縣九復有鄭縣舊志後魏屬宏農郡誤

後周屬滎州

隋書地理志汜水注云後魏置東中府東魏置北豫州後周置滎州

隋隸滎陽郡後併苑陵入新鄭

隋書地理志滎陽郡統縣十一注舊鄭州開皇十六年置管州大

業初復曰鄭州 新鄭注後魏廢開皇十六年復大業初併苑陵縣入焉有關官有大隗山

按後魏廣武郡有苑陵襄城郡復有鄭縣之名酈道元魏人也其注水經多言鄭縣實卽新鄭焉今隋書言新鄭廢於後魏疑或曹魏之兼稱

唐太宗元年分天下爲十道此隸河南道鄭州滎陽郡新鄭爲望邑

〔唐書〕地理志滎陽郡武德四年置治虎牢貞觀七年徙治管城

管城注武德四年以管城中牟原武陽武新鄭置管州并置須水清池二縣貞觀元年州廢省須水清池以管城原武陽武新鄭來屬 又汴州陳留郡尉氏注武德四年廢尉州以尉氏扶溝鄆陵

置洧州并置康陰苑陵新汲歸化四縣貞觀元年州廢省康陰苑

陵新汲歸化又云鄭州滎陽郡縣七管城望滎陽上滎澤望原

武緊陽武望新鄭望中牟緊

按苑陵城舊在新鄭

五代皆隸鄭州

五代史梁開平元年割鄭州之中牟陽武隸開封府是鄭州所領

獨管城滎陽滎澤原武新鄭五縣而已唐分中牟還其故乃得六

縣

宋分天下州軍爲十五路此隸京畿路鄭州滎陽郡奉寧軍節度熙

寧五年廢州以管城新鄭隸開封府元豐八年復靖康二年陷于金

宋史地理志至道三年分天下爲十五路天聖析爲十八元豐又析爲二十三崇寧以後累有建置天下分路二十六又京西路舊分南北兩路後併爲一路熙寧五年復分又熙寧五年廢鄭州以管城新鄭隸開封府省滎陽滎澤爲鎮入管城原武爲鎮入陽武元豐八年復州元祐元年還舊節復以滎陽滎澤原武爲縣與滑州並隸京西路崇寧四年建爲西輔大觀四年罷輔郡政和四年又復宣和二年又罷領縣五管城望滎澤中原武上新鄭上滎陽緊

金屬鈞州刺史統於南京道

金史地理志襲遼制建五京置十四總管府是爲十九路後復盡

升軍爲州

又云釣州中刺史舊陽翟縣僞齊升爲潁順軍大定

二十一年升爲州仍名潁順二十四年更今名縣二鎮一陽翟新

鄭鎮一

郭店

按今卧佛寺有正隆元年碑書縣令簿尉監稅皆有潁順軍字是金初尚仍僞齊之舊也

元置河南江北等處行中書省此隸汴梁路釣州

〔元史〕地理志立中書省一行中書省十有一 又云釣州下唐宋

皆不置郡僞齊置潁順軍金改順州又改釣州元至元二年又割

鄭州之密縣來屬領三縣陽翟下新鄭下密下

明初屬釣州後改屬開封府隸河南承宣布政使司

明史地理志洪武元年五月置中書分省治開封府二年四月改
分省爲河南等處行中書省三年十二月置河南都衛八年改都
衛爲都指揮使司九年二月改行中書省爲承宣布政使司開
封府注元汴梁路屬河南江北行省洪武元年五月曰開封府八
月建北京十一年京罷新鄭注府西南元屬鈞州隆慶五年七
月改屬西南有大騄山一名具茨山潁水出焉一名魯固河下流
入潁又南有陘山北有大河又有溱水一曰澮水流合縣南之洧
水

國朝因之雍正二年改屬直隸禹州十三年陞許州爲府新鄭隸焉
乾隆六年府廢仍隸開封府編戶一十九里

按舊志云新邑舊隸開封府禹州然州在西南府居東北由州旋府往返二百餘里後以高文襄奏請始改入府不惟可省奔命之勞而文書期會亦免稽滯之咎矣至今便之

夕

三

封建表

黃帝以神聖闢宇豈人臣封爵可比鄭韓奪人之國興霸僭王亦非茅土舊疆故皆不列入封建而別為錄記鄒自祝融受地于孫歷數千年漢荀氏晉華氏唐鄭氏並食邑累代開國承家均宜載厥本末焉因詳其世守以附于沿革之後

官號姓名功狀食邑始封

子

孫

後裔

帝世

火正祝融

氏黎

淳耀敦芒高辛時封長曰長琴天明地德辛帝以回次曰噎俱臨照四海代之回食不嗣封是食火土於吳是曰路史噎處吳回西極以行

帝馨高

楚語及史日月太子

卷一

沿革考

封建

古

程伯休父

辛

卷一

四

記云共工長琴居於
作亂帝嚳瑤山實始
命祝融誅樂風

之不盡乃

以庚寅日

誅之而以

弟回為黎

復居火正

祝融非也

吳回繼為陸終嗣卒會人嗣始鄒其後又
火正受封子六人四受姓曰邰有邰夷路
卒

日會人即
求言也
路史作李
言

鄭
王時滅於
鄒至周平
偏陽四國

右上古高辛氏封建國一 凡諸家之書已見沿革考者不

贅載

漢

萬歲亭敬

侯荀彧

魏武帝表封十二年	三國志建安八年	惲嗣	趙嗣
曰侍中守增邑十七	祖以女妻二子	惲真	
尚書令或年以侍中	或長子惲以外甥故		
積德累行光祿大夫	後稱安陽見寵待于		
少長無悔持節參丞	公主	文帝	
遭世紛擾相軍事卒	又云惲嗣又云趙嗣		
懷忠念治于壽春時	侯官至虎侯為散騎		
臣自始舉年五十	賁中郎將常侍後進		
義兵周游	初文帝與爵廣陽鄉		
征伐與或	平原侯植侯		
戮力同心	並有擬論計荀氏為		
左右王畧	文帝曲體萬歲亭侯		
發言授策	事或及或者三世		
無施不效	卒惲又與		
或之功業	植善而與		
臣由以濟	夏侯尚不		
用披浮雲	協文帝深		
顯光日月	惲惲早		
陛下幸許	卒		

沿革考

封建

或左右機
近忠恪祗
願如履薄
冰研精極
銳以撫庶
事天下之
定或之功
也宜享高
爵以彰元
勲或固護
乃受
食邑一千
戶後增至
二千戶

右漢封建侯國一

袁宏後漢紀並錄

獻帝建安八年春操破譚尚秋七月曹操上言守尚書令荀彧自
在臣營參同計畫周旋征伐每皆克捷奇策密謀悉皆共決及或

在臺常私書往來大小同策詩美腹心傳貴廟勝勲業之定或之功也而臣前後獨荷異寵心所不安或與臣事通功竝宜進封賞以勸後進者於是封或爲萬歲亭侯

十二年春營操上表曰昔袁紹入郊甸戰於官渡時兵少糧盡圖欲還許荀彧乃建進討之規遂摧大逆覆取其衆此或覩勝敗之機畧不世出紹旣破敗臣糧亦盡以爲河北未易圖也欲南討劉表或復止臣陳其得失臣用反於是遂平四州向使臣退於官渡紹必鼓行而前遂征劉表則河北延其日計或之二策以亡爲存以禍爲福臣所不及也是故先帝貴指縱之功薄搏獲之賞古人尚帷幄之規下攻拔之捷原其績效足享高爵而海內未喻其狀

所受不侔其功臣誠惜之乞重平議增疇戶邑或深辭讓操報之
曰君之策謀非但所表二事而已前後謙冲欲慕魯連先生乎此
聖人達節者所以貴也昔介子推有言竊人之財猶謂之盜况君
密謀安衆先於孤者以百數乎以二事相還而復辭何取謙亮多
邪三月癸丑增封守尚書令或戶一千并前二千戶操欲表或爲
三公或使荀攸申讓至于十數乃止

按曹學佺天下名勝志云黃水又逕萬歲亭後漢末荀彧封萬
歲亭侯于此三國志及袁宏後漢紀並云建安八年封或爲萬
歲亭侯但不註亭之所在顧景范方輿紀要謂萬歲亭在鄭
東與曹說互異乾隆元年黃水之東古田中有唐墓碑銘曰

州新鄭縣萬歲鄉萬歲里崔峙極殯在鄭州管城縣馬亭鄉華
城里其地則水經注所言黃水出黃泉東南流逕華城西也今
據黃水之發源入洧皆在新鄭境內漢亭唐鄉名既因地應
無殊焉且顧言亭在州東亦不援何書疑東當作西或傳寫之
誤耳故據曹說列入表內

晉

苑陵縣敬

敬曾孫表建興元年俊嗣為尚仲之嗣拜
孫虞子以進爵為公書郎卒大長秋

侯華恒

清素稱尚咸和初封
武帝女榮年六十九

陽長公主卒

為尚書初

封苑陵縣

公後元帝

時爵除又

以討王敦

卷一

沿革考

封建

三

功封苑陵

縣侯見晉

書

右晉封建侯國一 晉書本傳並錄

華恒字敬則平原高唐人表孫廩子也博學以清素爲稱尚武帝女滎陽長公主拜駙馬都尉元康初東宮建恒以選爲太子賓友賜爵關內侯食邑百戶辟司徒王渾倉曹掾屬除散騎侍郎累遷散騎常侍北軍中侯俄拜領軍加散騎常侍愍帝卽位以恒爲尚書進爵苑陵縣公頃之劉聰逼長安詔出恒爲鎮軍將軍領潁川太守以爲外援恒與合義軍得二千人未及西赴而關中陷沒時羣賊方盛所在州郡相繼奔敗恒亦欲棄郡東渡而從兄軼爲元

帝所誅以此爲疑分書與驃騎將軍王導導言於帝帝曰兄弟罪不相及况羣從乎卽召恒補光祿勳恒到未及拜更以爲衛將軍加散騎常侍本州大中正尋拜太常議立郊祀尚書刁協國子祭酒杜夔議須還洛乃修郊祀恒議漢獻帝居許卽便郊柴宜於此修立司徒荀組驃騎將軍王導同恒議遂定郊祀尋以疾求解詔曰太常職主宗廟烝嘗敬重而華恒所疾不堪親奉職事夫子稱吾不與祭如不祭况宗伯之任職所司邪今轉恒爲廷尉頃之加特進太寧初遷驃騎將軍加散騎常侍督石頭水陸諸軍事王敦表轉恒爲護軍疾病不拜授金紫光祿大夫又領太子太保成帝卽位加散騎常侍領國子祭酒咸和初以愍帝時賜爵進封一皆

削除恒更以討王敦功封苑陵縣侯復領太常蘇峻之亂恒侍帝左右從至石頭備履艱危困悴踰年初恒爲州大中正鄉人任讓輕薄無行爲恒所黜及讓在峻軍中任勢多所殺害見恒輒恭敬不肆其虐鍾雅劉超之死亦將及恒讓盡心救衛故得免及帝加元服又將納后寇難之後典籍靡遺婚冠之禮無所依據恒推尋舊典撰定禮儀并郊廟辟雍朝廷軌則事竝施用遷左光祿大夫開府常侍如故固讓未拜會卒時年六十九冊贈侍中左光祿大夫開府諡曰敬恒清恪儉素雖居顯列常布衣蔬食年老彌篤死之日家無餘財唯有書數百卷時人以此貴之子俊嗣爲尚書郎俊子仰之大長秋

唐

新鄭縣開

食邑三百左司郎中元嘉縣為有常嗣為有常子探戶見唐秦磁隰二州新鄭縣長水吏部常選賢為魏州

國男鄭世

貫所撰鄭刺史受封縣令卒府君及夫卒

斌

人崔氏合耐墓誌銘

昌樂朝城幸縣令探賢子恒試太常寺協律郎俱不嗣封

右唐封建男國一

墓誌並錄

鄭之先自周皇封舅之地因而氏焉別派五流深源一至是以榮陽之望得為首稱其下公侯接武台衡繼迹雕軒綉軸之榮羽蓋朱轡之盛由魯史記迄于唐春秋實鄭氏為衣冠之泉藪也高祖世斌皇左司郎中磁隰二州刺史新鄭縣開國男食邑三百戶曾祖元嘉皇新都長水縣令襲封新鄭縣開國男祖有常皇吏部常

選襲爵新鄭縣開國男烈考探賢皇魏州昌樂朝城莘縣令府君
諱恒字行甫皇試太常寺協律郎文業著於當時禮義飭於儒行
少有倜儻之志長負瓌琦之名不苟譽以求容每親仁以竭愛爲
中外模範成友朋宗師樂善孜孜不愠知鮮量苞江瀆氣合風雲
今之古人人唯上士神不僣德配壽胡羌先夫人之亡蓋世一霜
也享年六十夫人博陵崔氏令門清族慶餘承善四德兼備六親
雍和仁讓得於天真慈惠立於素尚母儀內則動靜可師禮行詩
風進止成法雖婕妤女史大家經教承之於諷習推之於行源者
亦異代殊人其歸一旨未亡之歎孀齡杳然玉沒何先蘭然遽至
以大中九年正月十七日病終於淇澳之私第享年七十有六以

大中十二年二月二十七日合祔于先塋之側其鄉里原隰之號
載於舊記此闕而不書女一人適范陽盧損之嗣子六人長曰頊
攝汲縣丞知縣事早亡次曰珮早亡次曰瑾次曰玘次曰璿次曰
琬咸繼遺芳克修至行銜哀茹毒追攀罔極將營護空泣告於業
文者爲之銘云仕門雙美兮令德咸芳甲族齊盛兮英華克彰允
文武兮書劍明揚蘊儀度兮閨門譽長珠沉玉沒兮人誰靡傷桂
殞蘭凋兮共泣摧香垂修名兮允謂不亡傳盛事兮多載彌光聽
悲風兮松韻連岡刻貞石兮永志元堂

按墓誌爲唐衡州司法叅軍秦貫撰載古文品外錄陳眉公云
得之黎人廢塚間且爲會真記辨誣夫名姓偶合誣之固不可

辨之亦枝指也

新鄭縣志卷之二

星野考

有圖附詳異

唐一行云星土以國爲斷則疆土變易不合天文之正言新鄭分野者多舉鄭韓所屬概之殆習而不知其誣歟新鄭自與三河同分諸說有據非可泥國名相統目也雖鶉火之當東周先儒亦嘗致疑然謀均從衆考星野者亦竊取三卿爲主之意云爾卽天象以驗人事祥異所出附見也作星野考

天文分野圖



柳星張周分之圖

舊作角亢氏劃分今據大衍歷議及清類分野訂正



六壬分野云今欽天監分配郡縣與唐志大抵相同祇有鄭分野本周畿內之地與周分州縣更互相屬分界之處理宜同占又按晉天文志以兗州為鄭分兗州乃魯國之地鄭與周同豫州之地今周分豫州三河則鄭分豫州明矣

○天尊

少微

長垣

張

宿





內平

軒轅

御女

天相

天廟



北斗七星分主九州其第三星曰機史記作機實主三河雷澤及兗青州

地縣與三河同分考北斗之分野當屬機星

春秋運斗極斗第一天樞第二璇第三璣第四權第五衡第六開陽第七搖第一至第四為魁第五至第七為標合而為斗

長歷

北斗七星星間相去九千里其二陰星不見者八千里也

春秋

緯文耀鉤三河雷澤東至海岱以北兗州青州屬機星

省志三

河之域於河南府為洛陽為鞏縣為偃師為孟津為盧氏為新安為澠池為宜陽為登封為嵩縣為永寧於陝州為閿鄉為靈寶於鄭州為滎澤為滎陽為河陰為汜水於禹州為密縣為新鄭於南陽府為南陽為鎮平為泌陽為唐縣為鄧州為內鄉為新野為淅

川爲裕州爲葉縣爲舞陽於汝州爲魯山爲郟縣爲寶豐爲伊陽
三台分係九州軒轅星對中台二星下爲有熊墟縣正有熊氏故都
考三台之分野當屬中台

〔摘輔象〕以九州繫於三台

〔唐大衍歷〕得四海中承泰階之政者

軒轅也故爲有熊氏之墟

〔山河兩戒考注〕三台六星在太微垣

西北軒轅之上上台二星起文昌下距北星去極三十度入柳宿

七度中台二星對軒轅距北星去極四十二度入張宿三度下台

二星抵太微垣距北星去極五十一度入翼宿二度

〔玉樞經〕北

斗爲帝座上有三台疊爲三級以復斗魁是名天階

〔禮含文嘉〕

三台爲天階太一攝以上下曰泰階

〔石氏曰〕中宮黃帝其精黃

龍爲軒轅首枕星張

詩推度災軒轅一曰權量主雷雨之神

武陵太守星傳軒轅十七星如龍形有兩角角有大民小民

金季夏盛德在土其帝黃帝高誘曰黃帝以土德王天下死托祀

於中央之帝

名勝志新鄭縣城內有軒轅邱

五星土曰填星位於嵩邱爲中州之域縣在中州嵩山東一百六十里考五星之分野當屬填星

大衍歷鶉火大火壽星豕韋爲中州其神主於嵩邱填星位焉

爾雅高高爲中嶽

潘岳懷舊賦前瞻太室旁眺嵩邱

楊爾京

象緯訂昔人以嵩高爲當天之中是就地而觀天也其北從天出於地而始其南至天之沒於地而終連北極出地三十六度極

南至五十五度當嵩高之上合來得九十一度爲天在地上之半
當天之中耳若欲求天之中須自北極而始至南極而終取一百
八十二度而中分之從北極積至九十一度纔爲天中則除去北
極之出於天上者三十六度自北極至嵩高之上止五十五度耳
又其南十二度爲夏至之日道又其南二十四度爲春秋分之日
道春秋分之日道者乃天之中道也所謂赤道是也日行中道爲
二分自中道而北向內二十四度爲夏至之日道自中道而南向
外二十四度爲冬至之日道二至之道相去通計四十八度從中
道而內外分之俱在嵩高之南雖夏至日道猶去嵩巔十二度故
從地上而觀但見日在南行也

〔甘氏曰〕鎮星主嵩高山

〔石氏

曰鎮星一名地侯

山河兩戒考注填一作鎮鎮靜也五星之中

鎮行最遲故以爲鎮也

荊州占填星出東方三百三十日而夕

伏西方三十日而復晨見東方其行歲填一星故名填星 淮南

子中央土也其神爲鎮星日行二十八分度之一歲行十三度百

一十二分度之五二十八歲而周

孔仲達左傳疏土三百七十

七日行星十三度

瞿曇悉達按歷法鎮星一年行十二度十一

萬六千四百三十三分度之四萬六千二百七十一二十九年百

六十八日千九百七十六分日之千一百三十七而周天是三百

八十三年而十三周天

巫咸曰填星所宿者其國安大人有喜

天千分配五方戊己爲中央當中州河濟之間縣處中州考十干之

分野當屬戊己

〔史記〕戊己中州河濟也

〔漢書〕戊魏己韓

地支在午宮曰獅子爲三河縣與三河同分考十二支之分野當屬
午

〔陳卓〕辰在午周分三河

〔指掌圖〕柳星張曰鶉火宮曰獅子時

曰午州曰三河

按班固漢書天文志一曰子周與此異

十二次配十二野鶉火爲季夏日月相會之次位在南正之中鄒地
係分野所屬縣正古鄒地考十二次之分野當屬鶉火

〔大衍歷議〕鶉火之次柳星張三宿酒旗屬柳軒轅內平天相屬七

星天廟屬張皆鶉火也位在南正之中分野屬三河古成周號鄭

竹書平王三年王錫司徒鄭伯命五年鄭遷于溱有此新鄭立國之始管檜鄭東號密滑唐申鄧祝

融氏之都新鄭境內及周召甘尹劉毛單武邊家樊石渠鄒左簡南鞏

芻萁辛祭陰仍成詹儋瑕老富聃賓慶黨夷原向游費梁鄭鄆暴

圭桃戈揚拒泉臯伊維小戎陰戎陸渾蠻氏茅戎之地皆其分也

鄭注月令季夏者日月會於鶉火斗建未之辰周禮鶉火一

名朱鳥注唐天文志柳七星張鶉火也初柳七度餘四百六十

四杪七少中七星七度終張十四度北自榮澤滎陽並京索暨山

南得新鄭密縣至外方山東隅斜至方城裕州抵桐栢北自宛葉南

暨漢東盡漢南陽之地又自洛邑負北河之南西及函谷逾南紀達

武當漢水之陰盡宏農郡以淮源桐栢東陽爲限而申州屬壽星

古成周鄭管鄩

新鄭東號汜水

密滑

偃師申陽

鄧及祝融氏之都新鄭爲

軒轅祝融之墟其東鄩則入壽星柳在輿鬼東又接漢源當商洛之陽接南河上流七星係軒轅得土行正位中岳象也河南之分張直南陽漢東與鶉尾同占

二十八宿柳星張三宿爲周分野開封府之禹州密縣新鄭係焉考二十八宿之分野當屬柳星張

天官書柳七星張三河

漢書天文志柳星張三河自柳三度至

張十二度

晉書天文志

自柳九度至張十六度爲鶉火於辰在

午周之分野屬三河

費直說周易起柳五度

蔡邕月令章句

起柳三度

皇甫謐帝王世紀自柳九度至張十七度

大衍歷

議初柳七度中星七度終張十四度

明大統書起柳四度止張

十四度

山河兩戒考註柳八星在鬼宿東南距西第三星去極

八十二度半北六尺爲七曜之中道

星七星六度太在極東南

距大星去極六十六度律書曰七星者陽數成於七故曰七星

張六星十七度太在軒轅首下太微垣西南距西第二星去極一

百二度半北十三尺七曜之中道

一行曰近代諸儒言星土者

或以州或以國虞夏秦漢郡國廢置不同周之興也王畿千里及其衰也僅得河南七縣今又天下一統而直以鶉火爲周分則疆場舛矣七國之初天下雌韓而雄魏魏地西距高陵盡河東河內

北固漳鄴東分梁宋至於汝南韓據全鄭之地南盡潁川南陽西達虢略距函谷固宜陽北連上地皆綿數州相錯如繡考雲漢天河之象多者或至十餘宿其後魏徙大梁則西河合於東井秦拔宜陽而上黨入於輿鬼方戰國未滅時星家之言屢有明驗今則同在畿甸之中矣而或者猶據漢書地理志推之是守甘石遺術而不知通變之數也

按古今言天文者班固陳卓費直蔡邕皇甫謐一行並謂壽星角亢氏辰屬鄭韓分野舊志引之不爲無據今詳班固云韓地角亢氏之分埜也韓分晉得南陽郡及潁川之父城定陵襄城潁陽潁陰長社陽翟郟東接汝南西接宏農得新安宜陽皆韓

分也及詩風陳鄭之國與韓同星分焉鄭國今河南之新鄭本
高辛氏火正祝融之墟也及成臯滎陽潁川之崇高陽城皆鄭
分也又云自井六度至亢六度謂之壽星之次玉海引魏氏說
駁之謂井乃秦分蓋疑班不當以壽星分野混入鶉首耳但韓
西接宏農包二周之地自新鄭以西崇高陽城新安宜陽皆屬
焉固已兼占三河鶉火之次矣而鶉首之次與鶉火相接據漢
書鶉首自井十度至柳三度卽爲鶉火所起之宿度獨謂壽星
自東井六度反居鶉首之前宜其不免後人之議歟郡縣之名
歷代沿革分隸不一諸家分野又或錯舉一二以例其餘其最
詳盡者莫如唐之大衍及明之大統二書大衍以新鄭統於鶉

火柳星張分野屬周三河後又云新鄭爲軒轅祝融之墟其東鄙則入壽星按穀梁傳云其曰鄙遠之也鄭自滅許以後東境式廓遠及開封之東南其與兗州同分壽星宜也而新鄭以西自屬鶉火與三河同分其不可以東方之宿統西方之地也明矣明清顛天文謂新鄭之西偏周分也與唐志合則新鄭雖爲鄭韓舊都而象緯所係是周非兗截然不紊若執地域以強配天文誤已久矣是不可以不辯

祥異

周

僖王元年

鄭子儀十四年

鄭南門中內蛇與外蛇鬪內蛇死

詳襟識

按蛇鬪劉向以爲近蛇孽也先是鄭厲公劫相祭仲而逐兄昭公代立後厲公出奔昭公復入死弟子儀代立厲公自外劫大夫傅瑕使繆子儀此外蛇殺內蛇之象也蛇死六年而厲公立莊公聞之問申繻曰猶有妖乎對曰人之所忌其氣炎以取之妖由人興也人亡釁焉妖不自作人棄常故有妖京房易傳曰立嗣子疑厥妖蛇居國門鬪卽此之占也

襄王三年

鄭文公二十四年

鄭燕姑夢天使與已蘭

詳襍識

靈王二十七年

鄭簡公二十一年

春無冰鄭饑

[左傳]魯襄公二十八年春無冰梓慎曰今茲宋鄭其饑乎歲在星紀而淫於元枵以有時菑陰不堪陽蛇乘龍龍宋鄭之星也宋鄭必饑元枵虛中也枵耗名也土虛而民耗不饑何為

景王二年

鄭簡公二十三年

鄭伯有氏門上生莠

[左傳]魯襄公三十年鄭子蟜卒將葬公孫揮與裨竈晨會事焉過伯有氏其門上生莠子羽曰其莠猶在乎於是歲在降婁降婁中而旦裨竈指之曰猶可以終歲歲不及此次也已及其亡也歲在

燬之口其明年乃及降婁

景王十年

鄭簡公三
十一年

鄭伯有爲厲

詳襍識

景王十九年

鄭定公
四年

鄭大旱

左傳魯昭公十六年九月大雩旱也鄭大旱使屠擊祝欸豎拊有

事於桑山斬其木不雨子產曰有事於山蓺山林也而斬其木其

罪大矣奪之官邑

景王二十年

鄭定公
五年

冬有星孛於大辰西及漢

左傳魯昭公十七年冬有星孛於大辰西及漢申須曰彗所以除

舊布新也天事恒象今除於火火出必布焉諸侯其有火災乎梓

慎曰往年吾見之是其徵也火出而見今茲火出而章必火入而
伏其居火也久矣其與不然乎火出於夏爲三月於商爲四月於
周爲五月夏數得天若火作其四國當之在宋衛陳鄭乎宋大辰
之虛也陳大皞之虛也鄭祝融之虛也皆火房也星孛及漢漢水
祥也衛顓頊之虛也故爲帝邱其星爲大水水火之牡也其以丙
子若壬午作乎水火所以合也若火入而伏必以壬午不過其見
之月鄭裨竈言於子產曰宋衛陳鄭將同日火若我用瓘斚王瓚
鄭必不火子產弗與

景王二十一年

鄭定公六年

夏五月火昏見壬午鄭災

左傳魯昭公十八年夏五月火始昏見丙子風梓慎曰是謂融風

火之始也七日其火作乎戊寅風甚壬午大甚宋衛陳鄭皆火梓
慎登大庭氏之庫以望之曰宋衛陳鄭也數日皆來告火裨竈曰
不用吾言鄭又將火鄭人請用之子產不可子大叔曰寶以保民
也若有火國幾亡可以救亡子何愛焉子產曰天道遠人道邇非
所及也何以知之竈焉知天道是亦多言矣豈不或信遂不與亦
不復火

景王二十二年

鄭定公七年

鄭大水龍鬪于時門之外洧淵

左傳魯昭公十九年鄭大水龍鬪于時門之外洧淵國人請爲禱
焉子產弗許曰我鬪龍不我覲也龍鬪我獨何覲焉禳之則彼其
室也吾無求於龍龍亦無求於我乃止也

按京房易傳曰有德遭害厥妖龍見又曰衆心不安厥妖龍鬪而劉向以爲近龍孽也鄭以小國攝乎晉楚之間重以彊吳鄭當其衝不能修德將鬪三國以自危亡是時子產任政內惠於民外善辭令以交三國鄭卒無患能以德消變之效也

顯王七年

韓懿侯九年

大雨三月

史記韓世家九年魏敗我澮注徐廣曰大雨三月也

顯王三十五年

韓昭侯二十五年

旱作高門

史記韓世家二十五年旱作高門屈宜臼曰昭侯不出此門門成

昭侯卒果不出

詳世家并雜志

漢

孝景帝元年秋七月乙丑三星合張

鄭樵通志金木水三星俱合於張

孝昭帝元鳳三年夏四月大水

鄭樵通志河南以東四十九郡皆水餘詳雜志

孝成帝元延元年秋七月孛星行軒轅

鄭樵通志有星孛於東井踐五諸侯出河戒北率行軒轅太微後

日六度有餘

孝平帝元始四年三星聚柳張

鄭樵通志三星聚於柳張各五日

世祖建武九年秋七月乙丑金犯軒轅大星十一月乙丑金又犯軒轅

後漢書天文志軒轅者後宮之官大星爲皇后金犯之爲失勢是時郭后已失勢見疎後廢爲中山太后陰貴人立爲皇后

建武十年十二月己亥大流星如缶出柳西南行入軫且滅時分爲十餘如遺火狀須臾有聲隱隱如雷

後漢書天文志柳爲周軫爲秦蜀大流星出柳入軫者是大使從周入蜀是時光武帝使大司馬吳漢發南陽卒三萬人乘船泝江而上擊蜀白帝公孫述

建武三十一年有客星見軒轅炎二尺所

鄭樵通志西南行至明年二月二十二日在輿鬼東北六尺所凡百十三日滅

孝明帝永平八年六月壬午長星出柳張三十七度犯軒轅刺天船陵太微氣至上階凡見五十六日去柳周地

後漢書天文志是歲多雨水郡十四傷稼

永平十三年冬十月客星出軒轅

鄭樵通志出軒轅四十八日

永平十八年六月己未彗星出張長三尺轉在郎將南入太微皆屬張

後漢書天文志張周地爲東郡太微天子廷彗星犯之爲兵喪

孝和帝永元十三年十一月乙丑軒轅第四星間有小客星色青黃
後漢書天文志軒轅爲後宮星出之爲失勢其十四年六月辛卯
陰皇后廢

孝獻帝建安九年冬十一月孛星入軒轅

鄭樵通志有星孛於東井入軒轅

建安二十三年春三月孛星歷軒轅

鄭樵通志晨見東方二十餘日夕出西方犯歷五車東井五諸侯

文昌軒轅后妃

三國魏

文帝黃初六年冬十月乙未孛星歷軒轅

鄭樵通志有星孛于少微歷軒轅

明帝青龍四年冬十一月己亥彗星見張

鄭樵通志長三尺逆西行四十一日乃滅

晉

武帝咸寧三年夏四月有星孛於女御

鄭樵通志正月又孛於東方

咸寧五年春三月有星孛於柳夏四月有星孛於女御

鄭樵通志七月又孛於紫宮

太康二年秋八月有星孛於張冬十一月有星孛於軒轅

太康四年十二月大水

晉書五行志河南及荆揚六州大水

惠帝元康五年夏四月孛星至軒轅

鄭樵通志有星孛於奎至軒轅大微經三台大陵

隋

文帝開皇六年秋七月大水

鄭樵通志河南諸州大水

仁壽二年秋七月大水

文獻通考河南河北諸州大水

唐

太宗貞觀九年四月丙午熒惑犯軒轅十年四月癸酉復行之

唐書天文志正曰熒惑主禮禮失而後罰出焉軒轅爲後宮
高宗永徽四年八月丁卯熒惑入軒轅

永徽六年秋水害稼

唐書五行志冀沂密兗滑汴鄭婺等州水害稼

武后久視元年十二月甲戌晦熒惑犯軒轅

史異自乾封二年後月及熒惑太白辰星凌犯軒轅者六

睿宗景雲二年鎮星太白合于張

延和元年六月有彗星自軒轅入太微至大角滅

明皇開元八年五月甲子太白犯軒轅

開元十四年秋大水

唐書五行志天下州五十水河南河北尤甚河及支川皆溢懷衛鄭滑汴濮人或巢或舟以居

肅宗至德二載七月己酉太白晝見歷鄭分十二月歲星犯軒轅大星

唐書太白晝見經天至十一月戊午歷秦周楚鄭宋燕之分
乾元三年彗星歷柳軒轅

唐書四月丁己有彗星于東方在婁胃間色白長四尺東方疾行
歷昴畢觜觿參東井輿鬼柳軒轅至右執法西凡五旬餘不見
代宗大歷五年二月乙巳歲星入軒轅六年八月甲戌熒惑犯鄭星
大歷九年五月己未太白入軒轅

德宗貞元四年夏鄭汴境內烏飛入魏博淄青二境衡木爲城

史異鄭汴境內烏皆羣飛集魏博田緒淄青李納境內衡木爲城
高三三尺方十里緒納惡而焚之信宿又然烏口皆流血

憲宗元和八年五月大雨大隗山摧

唐書五行志陳州許州大雨大隗山摧水流出溺死者千餘人

元和十年三月長星至軒轅

唐書有長星于太微尾至軒轅

穆宗長慶元年六月己丑太白犯軒轅右角因晝見至于九月

文宗大和二年九月歲星熒惑鎮星聚于七星

開成二年三月己巳彗星在張

唐書二月丙午起危長七八餘至三月己巳在張長八丈餘癸未
在軒轅右長三尺不見凡彗星凌犯未有如此之甚者

開成三年五月乙丑有大星出于柳張六月丁亥太白犯熒惑于張
唐書大星出柳張長五丈餘再出再沒

開成五年夏五月辰星見于弋星色赤如火

武宗會昌四年二月熒惑逆行守軒轅四旬乃去

會昌五年八月壬午太白犯軒轅大星

僖宗廣明元年賊人黃巢寇新鄭

唐書逆臣傳賊人黃巢寇新鄭陳許節度使崔安潛逐走之

昭宗光化二年五月甲子太白襲熒惑在軒轅后星上

昭宣帝天祐元年六月甲午太白在張芒角甚大

宋

太祖乾德四年六月己亥太白熒惑合于張

開寶八年六月甲子彗星出柳長四丈

〔宋史〕辰見東方西南歷輿鬼至東壁凡八十三日滅

太宗淳化五年六月丙午歲星太白合于柳

至道元年五月丙辰太白歲星合于七星不相犯

眞宗景德三年七月己酉辰星太白歲星合于柳

天禧二年八月癸丑歲星熒惑合于張

天禧三年六月辛亥彗星歷軒轅至七星

宋史出北斗魁第二星東北長三尺許北行經天牢拂文昌歷紫微三台軒轅速行而西至七星凡三十七日沒

仁宗景祐二年九月辛巳熒惑犯填星在張六度

嘉祐元年七月彗星歷七星

宋史出紫微歷七星其色白長丈餘至八月癸亥滅

英宗治平二年五月戊子太白犯填星在張五度八月己亥熒惑犯歲星躔柳七度半

治平三年三月壬午白氣貫軒轅癸未至張

史異彗星見西南北有星無芒彗益東方別有白氣一濶三尺許貫紫微極星并房宿首尾入濁益東行歷文昌北斗貫尾至壬午

星復有芒彗長丈餘濶三尺許東北指歷五車白氣爲岐橫天貫北河五諸侯軒轅太微五帝座內五諸侯及角亢氐房宿癸未彗長丈五尺星有彗氣如一升器歷營宿至張凡一十四舍積六十七日星氣孛皆滅

神宗元豐三年七月癸卯彗星犯軒轅

宋史癸未出太微垣至戊子出張凡三十六日不見

按宋諸星凌犯太繁今止載五緯及星孛等異

金

哀宗天興元年五月大寒如冬

金史正月丁酉大雪二月癸丑又雪戊午又雪五月大寒如冬

按禹州志亦載此云是歲兩省軍潰於三峯山下

元

世祖至元三年霖雨害稼

〔元史五行志〕四月至七月鈞州新鄭密縣霖雨害稼

至元八年淫雨害麥

〔元史鈞州新鄭縣〕淫雨害麥

順帝至正三年二月地震

〔元史鈞州新鄭密縣〕地震

至正十九年蝗

〔元史鈞州新鄭密縣〕皆蝗食禾稼草木俱盡所至蔽日礙人馬不

能行填坑塹皆盈饑民捕蝗以爲食或曝乾而積之又罄則人相食

至正二十二年秋蝗

〔元史〕鈞之新鄭密二縣皆蝗

明

憲宗成化二十年大饑人相食

世宗嘉靖七年蝗大饑十七年大饑人相食三十四年地震

三十七年李樹生王瓜三十九年牛生麟四十一年春二月不

雨至于夏五月縣鐘自鳴

穆宗隆慶元年豕生象三年大水四年嘉禾生

舊志生城東一禾兩穗

神宗萬歷三年雨霽着屋牆經歲不落 六年彗星見于鄭野其長

竟天 十一年潦洧暴漲平地深丈餘沿河數百家人畜多溺死

十五年春地一日三震 十六年大饑人相食 十八年三月三日

黑風自北來晝晦頃天稍赤空中若有旌旗狀次日方息 二十一

年大饑人相食 三十一年大水 四十一年大水 四十四年大

蝗蔽天小蝻匝地寸草無收 四十五年蝗蝻復生

舊志知縣陳大忠捕近千石有瘞蝗處

四十六年二月暴風霾竟日移高文襄公欽賜坊石數步碎之 四

十七年大旱無麥禾

熹宗天啓四年四月十九日烈風雨雹須臾深尺餘損麥禾幾盡
舊志雹小者如雞卵大者如斗

莊烈帝崇正四年十月大雪五日夜平地深六尺許人畜多凍死
五年六月雨旬日不止後復大雨三晝夜洧水泛漲城垣民舍多圯
七年日出色如火怪風屢作覲面莫能識鐵器皆有火光沙雞來

豫變紀畧沙雞自北來滎陽新鄭尤多

十三年旱蝗蝻徧野七月始雨八月二十四日霽霜殺蕎九月人相
食地裂

舊志是年秋末縣西南二十里桐樹張家莊地裂濶二尺餘長三
十餘丈水溢出

十四年春饑大疫死者相枕藉夏獲麥無人蝗秋無禾冬十一月登封土寇李際遇攻城知縣劉孔暉禦之賊遁去

舊志是歲菽麥種每斗價五千

十五年春正月十有四日流寇陷城知縣劉孔暉主簿陳周俊教諭談王道皆死之

明史忠義傳劉孔暉邵陽人舉天啟元年鄉試知新鄭固守不能支遂死之士民祀之子產祠

豫變紀畧孔暉知賊決計於汴乃

誓死拒守作絕命詞一章寄其父賊奄至力竭城陷被執不屈死
贈尚寶卿

十六年大旱自三月至七月始雨無禾

舊志是歲收麥每斗價六千

十七年人相食

國朝

順治五年夏靈雨連月禾稼潰毀十五年並蒂蓮開結實

舊志並蒂蓮開國子生馮三思池中

十六年瑞麥嘉禾白鵲生

舊志麥一本十九穗生員高竒明以聞縣馮三思庭樹巢鵲生五

雛一純白府志作禾一莖兩穗生員劉楷獻于縣庭

十七年夏四月瑞鵲生

開封府志新鄭又生白鵲雛二

康熙四年夏大雨 十一年夏有蝗至秋大雨

舊志知縣李永庚夢子產令修城垣預防水患藉告紳士以停黃河夫役留築本縣河堤爲請於是開濬濤洧故流由鳳臺寺西折而南俾遠邑壩至秋雨水果漲然禾稼雖沒而城市無恙至今賴之

十三年夏六月大旱 十五年八月有異鳥集大隗山羽毛五彩羣鳥隨之越宿始去 十七年元旦文昌閣吐光中現魁星像士民皆聚觀 十八年春夏旱秋大雨彌月七月嘉禾生

舊志穀雙岐生貢生李一第田中

十九年夏秋大旱 二十六年春夏大旱 二十八年春夏大旱九

四十年有年

佛閣所伏穴在泥像帶間竅如蟲透屋飛去柱有爪痕深寸餘

風微雹秋大風雨損禾稼冬旱三十七年二月有龍起于書院旁

是歲旱三十六年春旱二月二十七日大風損麥三月初二日六

四月二十八日有黑風自北來逾時始霽五月初二日風霾竟日夜

屋拔木壞西城女牆三十三年四月雨雪秋冬旱三十五年

二十九年正月天雨豆莢實甚小三十二年大風從西北來發

連歲饑饉麥有年二十三年小滿日獲麥有年二十六年水

三級七年大水十五年大有年二十二年大水冬雪大寒時

乾隆四年六月大雨三日夜消水壞縣西門入南門沒石階不盡者

王廟地於河十三年水

雍正元年大水八年六月大雨三日消水齧城西門南門水北大

泉竭牛疫秋無禾冬饑

四十八年大饑疫五十二年大旱麥種不入六十一年大旱水

十四年水三十五年旱三十六年四月地震四十七年旱

三十三年春正月不雨至于夏八月秋七月雨此自明成化舊志至

月早霜敗麥枯二十九年春大旱夏五月雨秋復旱牛疫冬有雪

